



2020-mut aningaasanut inatsimmi ukiuni sisamani ukiumut 6 mio. kr-inik immikkut misileraalluni aningaasaliissuteqarnissamik Naalakkersuisut peqquneqarnissaannut Inatsisartuni aalajangiiffigisassatut siunnersuut. Suliniummut aningaasaliissutit 2020-mit meeqqanut inuusuttunullu sumiginnakkanut qimarnuinnik (isumassuivini) pilersitsinermik misiligutitut suliniutinut sukumiisunut qinnuteqarnikkut kommuninut atugassanngortinneqassapput.

(Inatsisartunut ilaasortaq Peter Olsen, Inuit Ataqatigiit)

(Siullermeerneqarnera)

Meeqqat sumiginnakkat ikilisarneqarnissaat politikerit pinngitsoqaratik ilungersunartutut isigisariaqarpaat.

Meqqat avatangiisiminni eqqissiviillioortunit eqqorneqartarnerat pillugu siunnersuuteqartup ernummatai paasilluarpagut aamma isumaqarpugut iliuuseqartoqartariaqartoq meeqqat taamatut misigitinneqartutut ikilisarumallugit.

Eqqumiigaara siunnersuuteqartoq allamat, ukiut kingullit ingerlanerini angerlarsimaffinni meerartalinni eqqissiviillioortitsinerit amerlialuttuinnarsimasut naak politiit nalunaarutaanni allamik allassimasoqaraluartoq.

Uanga takusinnaasakka naapertorlugit angerlarsimaffinni eqqissiviillioortitsinerit ikiliartorsimapput 2014-mi 2.835-niit 2018-mi 2.282-nut, aamma takuneqarsinnaavoq angerlarsimaffinni meerartalinni eqqissiviillioortitsinerit 2014-mi 500-t missaaniissimasut aamma taakku ullumikkut ikilisimapput siusinnerusumut naleqqiullugu. Neriuppugut aamma ikiliartortuarumaartut.

Soorunami kusanangilaq angerlarsimaffiit eqqissiviillioortitsinerit meerartaqartarmata tamannalu soorunami iliuuseqarfigineqartariaqarpoq.

Kalaallit Nunaanni politiit 2018-mut nalunaarusiaminni allapput pinerluttarneq imminut illersorniarluni pigajuttartoq imaluunniit imigassartorpallaarsimaneq pissutaalluni pisartoq tassaasoq inunnut pinerluttulioortarneq taakkulu ikiliartunngitsut, paarlattuanilli pinerlunnerit eqqarsartitsilaarsinnaasartut soorlu tillinniartarnerit, ikiliartortut.

Isumaqarpugut imigassamik pisisinnaanerup nioqquteqarsinnaanerullu killilersornissaat imaluunniit imigassaq pillugu ussasaarutini inerteqquteqalerneruq inuit imigassartorpallaarsimallutik iliuuseqartarnerannut allanngortitsinaviannngitsoq. Tassani isumaqarpugut inunnut atornerluilersimasunut pinaveersaartitsisariaqartugut taamaasiornikkullu angerlarsimaffinni meerartalinni eqqissiviillioortitsisarnerit ikilisarlugit.



Kingullermik ataatsimiikkatta Naalackersuisut peqquagut nuna tamakkerlugu atuuttussamik iliuusissanut pilersaarusoqqullugit meeqqat sumiginnarneqartartut ikilisarnissaat siunertaralugu aamma nalunngilarput ilaqutariinnut politikki ataatsimoortoq saqqummiunneqassamaartoq. Taamaattumik isumaqataavugut oqartoqarmat ilaqutariit tamarmik aallaavigineqartariaqartut meeqqat sumiginnarneqartarnerat pinngitsoortissagutsigu meeqqallu arsaarinnissutigineqartarnerannut pisariaqartitsineq piissagutsigu.

Ajornartorsiutip qitia aallaavigalugu ilaqutariillu ataatsimut isigalugit katsorsarneqartanngippata taava siunissami meeqqat sulia amerlanerusut angerlarsimaffiup avataanut oqquffissarsiortarnerat millisarnaviannngilarput.

Aamma pissusissamisoortutut isiginngilarput siunnersuut akuerineqassagalarutsigu, Naalackersuisut uangullu kommuninik oqaloqateqaqqaarsimatinnata aamma taamaattumik siunnersuutip itigartinneqarnissaa inassutigaarput.